

■ PLAID PER LA 3. DUMENGIA DA CUREISMA

Jesus scatscha ils marcadonts ord il tempel

DA SUR GEORG CHANGETH, MUSTÉR

Cu nus udin da quella scatschada dils marcadonts egl'evangelì dalla tiarza dumengia da cureisma essan nus surstai digl'agir da Jesus. Aschia enconuschin nus buc El: talmein en gretta, aschi vilaus. El che plaidda schiglioc adina da carezia e da migeivladad, El provochescha, consternescha, El fa uorden. E pertgei fa Jesus quella rueida? Jesus sez dat la risposta: «Buca fagei ord la casa da miu Bab ina halla da fiera!» El sentenziescha pia ch'ins fa fatschentas el tempel. El sentenziescha il survetsch divin venal. Jesus di: «Els venereschan mei mo cun las levzas; lur cors ein denton lunsch naven.»

Jesus vul buca mo criticar il survetsch divin e las unfrendas: El sedamonda tgei che quei cult el tempel munti e muossa vi sil tempel da siu agen tgerp. Buca mo la schubradad dil tempel ei per El impuronta, moibein El vul che la casa da Diu seigi puspei ina casa d'oraziun. Ella brev als da Corint scriva sogn Paul: «Saveis buca che vus essas in tempel da Diu e ch'il

Spèrt da Diu avda en vus? Mo sch'enzatgi disfa il tempel da Diu, in tal vegn Dieus a far ir alla malura. Pertgei il tempel da Diu ei sogns; e quel essas vus.» La cureisma ei per scadin in appel da sedi-stanziar dallas caussas exteriuras e dad anflar la via che meina tier Diu che viva en siu cor.

Dieus regala sesez a scadin che crei enten el. Dieus ei presents buca mo ella casa da Diu, moibein ell'olma da mintga carstgaun. Entras il Spèrt da Diu ch'ei daus a nus essan nus sez daventai tempel da Diu. Nus stuein buca pér far ch'el seigi cuntents cun nus, El ei grazius e misericordei-vels, pazients e plein buontad.

El ei era buns enviars ils nauschs e malengraziavel. El enquera quels ch'ei sepiars, entochen ch'el anfla els.

Jesus muossa ina nova fuorma da sentupada cun Diu. El less avdar en nos cors. Quei ei la relaziun persunala cul Segner. Tras quella vegnin nus adina pli datier

da Diu. Tras la cardientscha havein nus sustegn en scadina situaziun da nosa veta. Sche nus vivin sapientivamein cul Segner ch'ei levvas da mort en veta e che viva en nies miez; e sche nus essan ina cuminonza da carezia e da misericordia, lu essan nus tempels da Diu sco Jesus ha giavischau quei.

Jesus sez ei il liug dalla preschientscha da Diu. El sez vegn ad esser la vera unfrenda. El vegn a seunfrir per biars. El di: «Negin vegn tiel Bab auter che tras mei.»

Il ver tempel, il ver liug d'adoraziun, il ver survetsch divin sesanfla leu nua che carstgauns vivan concretamein cun Diu. E la historia, nua che Jesus purifichescha il tempel, less dir a mi persunalmein: Sestenta per in cor schuber, per inolma pura. Allontanescha tut il schliet, manzegna e cuglienem e tut puccau; e sestenta da plascher al Segner. Sche la cuolpa fa grev a nus, lu astgein nus vegnir tiel Segner; el purifichescha nus tras siu perdunament. Lein viver en pasch cun Diu e cun nos concarstgauns.

L'emprima giada dus levels al MINT-Camp GR 2018

■ (rtr) Dapi tschintg onns datti uss il MINT-Camp GR. Il MINT-Camp è in'emna nua che scolars da la terza fin la sis-avla classa pon guardar davos las culissas da professiuns da MINT. Professiuns da MINT èn professiuns da matematica, informatica, scienza natirala e tecnica. Il MINT-Camp vegn organisà

dapi tschintg onns da la scola'auta da pedagogia Grischun e da la Ems-Chemie. Ils students da la scola da pedagogia pon uschia emprender dad ir enturn cun uffants ed ils uffants vegnan gia fitg baud en contact cun professiuns da MINT. Quest onn datti però er anc insatge nov. 20 uffants han quest onn la pussaivladad da gu-

ardar pli profund en la materia. Per 20 uffants ch'eran gia l'onn passà al MINT-Camp datti uss il nivel 2. Durant dus dis pon ils 20 uffants dal nivel 2 ir in pass pli lunsch e duvra lur savair da l'onn passà. Il nov model è fitg bainvesi tar ils uffants. Il pli gulent avessan ils uffants ina entir'emna MINT-Camp en il nivel 2.

■ REFURMAS DA TGIRA

Necessari d'adattar la finanziaziun

(cp) Cun las refurmas tar la tgira stattan per ils proxims onns gronds projects en l'agenda politica. Las consequenzas vegnan las vischnancas a sentir directamain. En il center stat la dumonda: Co pon ins segirar en l'avegnir als pazients in provediment da sanadad e tgira per la vegliadetgna che correspunda als basegns regiunals. Ils fatgs èn dads: La gliud vegn adina pli veglia, las malsognas cronicas e multimorbidas creschan ed il persunal sin il champ da la tgira manca. Cunquai che blers carstgauns vegls han il giavisch da pudair star a chasa uschè ditg sco pussaivel vegn il squitsch sin il provediment ambulat a crescer. En vista al potenzial per la tgira chasana sa tracti da realisar estructuras intermediaras per pudair abitar (a chasa) e vegnir tgerà.

Las vischnancas èn responsablas da garantir in provediment da basa. Quai munta ch'ellas èn exponidas finanzialmain. Na main che 18 milliardas francs vegn la tgira

a lung termin a custar l'onn 2030, sco quai ch'il cussegl federal calculescha. Las expensas publicas per la tgira vegnan a triplar, pia ad esser trais giadas pli autas ch'oz. Quels custs vegnan a far or ina quarta da tuttas expensas per la sanadad.

Dapi il nov urden da finanziaziun la tgira da l'onn 2011, che preveda contribuziuns fixas dals pazients e segirads, van tuts augments da custs vi senz'exceptziun sin il maun public. Las vischnancas, che han uss da finanziaziun il rest, daventan in di las finanziaziadras principals.

Tenor l'Associaziun da las vischnancas svizas ha i uss num agir. Pretendidas vegnan perquai novas estructuras da provediment e models da finanziaziun. A curt termin èsi necessari da megliar la finanziaziun da la tgira cun adattar las contribuziuns dals segirads mintgamai tenor ils custs per las prestaziuns da tgira per uschia pudair distgargiar finanzialmain las vischnancas.

■ RESUNS

Radio Romontsch internaziunal

Ils giugs dall'Olimpiada ein vargai. Da Pyeongchang eis ei vegniu rapportau egl'entir mund davart las numerusas occurrenzas entras la televisiun, il radio e la pressa. Legrevlamein ei era il Radio Romontsch staus presents. Ses dus rapportaders, Roger Alig ed Andreas Wieland, han informau ils Romontschs en moda cumpetenta e spanegionta. Els han commentau il bia las cuorsas directamein, specialmein dallas skiunzas e dils skiunzs svizzers e quei en ina fuorma interessanta, informativa e magari drammatica. Igl ei stau in deletg da tedlar ils dus schurnalists romontschs.

Ozildi vegn magari criticau igl engaschament dil Radio Romontsch en occasiuns da sport internaziunalas pervia dils aults cuosts. Sche quei vegness denton buca fatg vess ei segir num ch'il Radio Romontsch porti nuot. Insumma ein las reportschas da sport romontschas fetg bunas, ellas vegnan fatgas cun engaschi ed ardimment. Quei vala era per las ulteriras emisiuns romontschas. Nus Romontschs savein esser loschs ed engrazievels d'aver in agen radio gl'entir di e sperain che quel sappi exister vinavon! *Norbert Berther, Tujetsch*

■ HTW CUIRA

Far attent a la persistenza cun «poetry slam»

(rtr) Cun vers e rimas ha la Scola auta da tecnica ed economia HTW a Cuira lantschà in'emna da persistenza. Durant quell'emna duain divers temas en connex cun persistenza, clima u natira vegnir discutads. Suenten in pled d'avertura da la presidenta dal cussegl communal da Cuira e manadra dal WWF Grischun, Anita Mazzetta, è l'emna da persistenza da la HTW vegnida averta cun poesias, rap e sgnoccas – e tut quai pachetà en «poetry slam». Tschintg artists da poetry da tut la Svizra han preschentà lur patrats en connex cun persistenza sin la tribuna dal Quadro 22 a Cuira. Mintgin ha gi sis minutas per persvader il public. Ils artists da «poetry slam» ch'èn sa preschentads a Cuira sa partecieschan er uschiglio sin tribunas tar concurrenzas da «poetry slam». Sin la tribuna dal Quadro 22 èn Kay Wieoimmer, Sarah Altenaichinger, Tommy Trixa, Ladina Bösch ed Elia Schmitter sa preschentads.

Davent dals 26 da favrer en fin ils 2 da mars organisescha la HTW ensemen cun la PHGR ina emna da persistenza. Durant questa emna datti divers occurrenzas che duain sensibilisar sin temas sco il clima, la natira u er la societad da sfarlattim.



Il sulegl dalla damaun porta glisch ell'umbriva.

FOTO E. MONN



Leise ging ich ohne grosse Abschiedsworte, der Vater rief, ich durfte gehen, warten werde ich an einem andern Orte, wo einst wir uns dann wieder sehen!

Annunzia da mort

Ei ha plaschiu al Tutpussent da clamar ord questa veta nies car frar, quinau, padrin ed aug

Giusep Venzin

19.3.1950 – 27.2.2018

Suenten ina veta luvrusa pils ses dacasa e sia carezada natira ei nies car Sepli vegnius deliberaus da ses mals ed ei sedurmentaus anetgamein a casa.

Nus engraziein ad in e scadin ch'ei sentupai cun el en amicabladad ed aschia accumpignau nies Sepli atras sia veta.

Adressa da malencurada:
Lino Miranda
Schellenbergstrasse 67
7000 Cuera

En engrazieivladad e davos salid:
Guido e Silvia Venzin, cun famiglia, frar
Werner Venzin, frar
Walter e Lisette Venzin, cun famiglia, frar
Pius Venzin, frar
Pasquale Miranda, cun famiglia, quinau
Lino Miranda e famiglia, figliol
Flavio Murer e famiglia, figliol
Anna Acton e famiglia

Naven da gliendisdis, ils 5 da mars 2018, 16.00 sesanfla l'urna ella caplutta da morts a Platta.

Il survetsch divin funeral cun la sepultura dall'urna ha liug mesjamna, ils 7 da mars 2018, 14.00 ella baselgia da Sogn Martin a Platta.